

Pressiteedüs 11. jaanuar 2016

Neläs Uma Pido tuu keväjä Indsikurmu 3000 laulja ümbre

Pääle nakanu 2016. aastak om neländä võrokeelitse laulu- ja rahvapido Uma Pido aastak. Neläs Uma Pido, miä tulõ 28. mail Põlvan Indsikurmun, avitas müüdälännü muusiga-aastakka võrokõisilõ jakada ja hoit laulu ja pillimängu õks meelen.

Laulupido olõ-i õnnõ kontsõrt ütäl pääväl. Seo om tii, midä müüdä kävven pidolisõ', nii laulja' ku päältkaeja', hinnäst pidolõ valmis säädvä'. Inne pito tulõ lämmistüses mitmit ettevõtmiisi, miä avitasõ' pido teema – mõtsa ja väeliidsi puiõ pääle mõtõlda ja hoitva meelen umakandi kiilt ja kultuuri.

Ku inne kolmandat Umma Pito (2013) käve läbi terve Vana-Võromaa võrokõisi vahtsõnõ lipp, sõs no' lätt umaperätsele tiikunnalõ laul – et saia' 28. mai õdagus pidolõ Indsikurmu ja panda säääl pidotuli palama. Laul lätt pidolõ muidoki ütten pidos har'otavidõ kuurõga. A päält tuu peetäs meelen, et inne koorilaulukultuuri alostust laulsõ mi rahvas regilaulõ ja ka parla eläse koori- ja rahvalaulukultuur kõrvuusi. Nii om plaanin aprillin-main inne pito kõrralda egän Vana-Võromaa kihlkunnan ja Setomaal rahvalauluõdagit, kon umakandi laulõ lautas.

Müüdä Vanna-Võromaad nakkas ringi käümä ka pidoteemaline fotonäütüs. Uma Pido kunstnigu Prangli Anne ja fotokunstnik Lauritsa Piitre kuuntegemisest sündü' mineväl suvõl pildi', miä kõnõlõsõ' inemiisi umavaheliisist suhtist ja näide kõüdüssist luudusõga. Kirämiis Ilvesse Aapo märkse piltele allkirä' ja ildampa veebruarin läävä' kats komplekti näütüst Vanna Võromaad pite käümä. Näütüst saa vällä lainuta ka päält pito.

“Umalõ Pitolõ om kirja pant 2700 lauljat 132 koorist ja näid tulõ viil mano. Õks om sändsit, kinkal om otsustamisõs inämb aigu lännü. Kõrraldaja' omma' tahtnu näile vasta tulla' ja uutva viimätsit kirjapandjit. Tuu piässi lauljidõ arvu viil mõnõsaa võrra suurõmbas tegemä,” ütles pido projektijuht Ojari Triinu ja rõõmustas, et lauljit tulõ pidolõ jälki pall'o.

Laulma om kutsut ka “nurmõnaisi” Võro ja Põlva naisikuurõ mano – nii tulõ Uma Pido naisikooriväkke mano mõnikümmend naist. Talvõaigu loodõtas mano ka mihihelle, ku pidolõ ütten mihiikuurõga kutsutas laulma “mõtsamihi”. Pidokutsõt omma' kuulnu ka kunnakoori' – parla om kirän 11 ansamblimõõtu kuuri, miä tahtva pidol ütiskuurõ jaon ütten laulda.

Neläs Uma Pido tulõ 28. mail 2016. Seo om terve Vana-Võromaa ja timä katsa kihlkunna rahva umakeeline laulupido, kon lauldõn tuntas rõõmu uma rikka kultuuriperändüse ja ummamuudu ilmakaemise üle. Pido lavastaja om Põlvast peri vabakutsõlinõ näütlejä ja lavastaja Tootsi Kristo ja pido kõnõlõs mõtsast ja väeliidsist puiõst.

Teedüst saa mano:

Triinu Ojar

Uma Pido projektijuht

Võro Selts VKKF

tel 533 22 153

triinu.ojar@wi.ee

www.umapido.ee